

opffere ein Opfer zum süßen geruch. Vnd ob ein Frembling bey euch wonet oder vnter euch bey ewren Freunden ist / vnd wil dem HERRN ein Opfer zum süßen geruch thun / der sol thun / wie sie thun. Der ganzen Gemeine sey eine Satzunge / beide euch vnd den Fremdlingen / Ein ewige Satzunge sol das sein ewren Nachkomen / das fur dem HERRN der Fremdling sey / wie jr. Ein Gesetze / ein Recht sol euch vnd dem Fremdlingen sein der bey euch wonet.

Und der HERR redet mit Mose / vnd sprach / Rede mit den Kindern Israel / vnd sprich zu jnen / Wenn jr ins Land komet / darein ich euch bringe Exod. 23.
Deut. 8. / das jr esset des brots im Lande / Solt jr dem HERRN ein Hebe geben / nemlich / ewers Teigs erstling solt jr einen Kuchen zur Hebe geben / Wie die Hebe von der scheunen / also solt jr auch dem HERRN ewers Teigs erstling zur Hebe geben bey ewren Nachkomen.

Vnd wenn jr durch vnwissenheit dieser Gebot jrgend eins nicht thut / die Leui. 4. der HERR zu Mose geredt hat / vnd alles was der HERR euch durch Mose geboten hat / von dem tage an / da er anfieng zu gebieten auff ewre Nachkomen / Wenn nu die Gemeine etwas vnwissend thet / So sol die ganze Gemeine einen jungen Farren aus den rindern zum Brandopffer machen / zum süßen geruch dem HERRN / sampt seinem Speisopffer vnd Tranckopffer / wie es recht ist / vnd ein zigenbock zum Sündopffer. Vnd der Priester sol also die ganze Gemeine der Kinder Israel versünen / so wirds jnen vergeben sein / denn es ist ein vnwissenheit / Vnd sie sollen bringen solch jre Gaben zum opffer dem HERRN / vnd jre Sündopffer fur den HERRN vber jre vnwissenheit / so wirds vergeben der ganzen Gemeine der Kinder Israel / Da zu auch dem Fremdlingen der vnter euch wonet / weil das ganze volck ist in solcher vnwissenheit.

Wenn aber eine Seele durch vnwissenheit sündigen wird / die sol eine jerige zige zum Sündopffer bringen. Vnd der Priester sol versünen solche vnwissende Seele mit dem Sündopffer / fur die vnwissenheit fur dem HERRN / das er sie versüne / so wirds jr vergeben werden. Vnd es sol ein Gesetz sein das jr fur die vnwissenheit thun solt / beide dem Einheimischen vnter den Kindern Israel / vnd dem fremdlingen der vnter euch wonet.



Wenn